

Pablo Timoteore ojamu'tāca pūrī ni'i

A'ti pūrī a'tiro weero ojano'pā nise ni'i

Timoteo Listra wāmetiri macāpu bajuacu niwī. Cū pacu griego masū nígū, judío masū mejēta nicu niwī. Cū paco pūrīcā judío masō nico niwō. Cū Pablōre queti miaco'tegū nicu niwī.

Pablo Éfesopu nígū, Timoteore a'ti pūrīrē ojacu niwī. Timoteore cū ējōpeosere wācūtutuacā weenemogū, Jesucristore ējōpeori curuacjārā tiropure añurō nisetidutigū ojacu niwī.

A'tiro ojacu niwī. “Ō'acūrē sērīrā, a'tiro weeroꝯa'a”, ni ojacu niwī. Tojo nicā mūsārē sū'ori nisetiacārē besesōrōrā, ā'rānojōrē sōrōrōꝯa'a nisere ojacu niwī. Wapewia numiarē co'tesere, tojo nicā apeye ojanemocu niwī. Añurō wéerā bu'iri marīrā nisetisere ojacu niwī. Queoro bu'etirārē tū'omasīdutisere ojacu niwī.

Pablo Timoteore oja'que ni'i

¹ Yū'ū Pablo Jesucristo besecū'cu ni'i. Ō'acū marīrē yū'ruogū nimi. Cūta Jesucristo ye quetire weredutigū o'ōwī. Jesucristo marī wiogū quē'rā yū'ure o'ōwī. Cūrēta marī yucuerā wee'e.

² Timoteo, mu'urē oja'a. Mu'ū Jesucristore ējōpeoyucā, yū'ū macū waro weronjō ni'i.

Õ'acũ marĩ pacu, tojo nicã Jesucristo marĩ wiogu mu'urẽ añurõ weeato. Pajaña'to. Mu'urẽ ejerisãjãcã weeato.

Nisoosere cã'mota'aduti'que ni'i

³ Yu'u Macedoniapu wa'ase duporo mu'urẽ ti macã Éfesopu tojadutiwu. No'o mejẽcã bu'erãrẽ cã'mota'adutigu tojaque'adutiwu. Ni'cãrõacãrẽ mejãrõta nigũti tja. ⁴ Tocjãrãrẽ wereturiamasere, tojo nicã na ñecũsumuarẽ wãmepeonu'cũsere “Wãcũma'aticã'ña”, niña. Masã tere wãcũrã, mejõ waro a'metu'tima'asama. Marĩrẽ Õ'acũ weeduti'quere añurõ weecã weewe'e. Marĩ cũrẽ ãjõpeose me'rã pe'e Õ'acũ weeduti'quere wee'e. Tojo weegu narẽ mejẽcã bu'esere cã'mota'aya.

⁵ Mũsarẽ a'merĩ ma'icã uagu, tojo duti'i. Ña'ase marĩrã, bu'iri marĩrã tu'oña'rã, diacjũ Õ'acũrẽ ãjõpeorã, queoro ma'irãsa'a.

⁶ Æpẽrã tere weetima. No'o uaro ucũma'ama.

⁷ Õ'acũ ye cjase cã duti'quere bu'esĩ'rĩmima. Tojo weemirã, na ucũsere tu'omasĩtima. Masĩbutiarã weronojõ bu'ema.

⁸ Marĩ masĩ'i. Õ'acũ Moisére dutise cũu'quere queoro masĩcãma, añu ni'i. Te a'tiro ni'i. Masã Õ'acũrẽ yu'rũnu'cãsere masĩdutigu cũucu niwĩ. ⁹ Õ'acũ tere cũúgã, queoro weerãrẽ cũuticu niwĩ. Cũrẽ yu'rũnu'cãrãrẽ, cã dutiro weetirãrẽ cũucu niwĩ. Tojo nicã ña'abutiario weeri masãrẽ, ña'arõ weenu'cũrĩ masãrẽ cũucu niwĩ. Õ'acũrẽ ãjõpeotirãrẽ, cã ye bu'ese cjasere uatirãrẽ cũucu niwĩ. Apeyere, no'o

pacure, pacore wějěcō'arārē, nipe'tirā no'o wějěsebucurārē cūucɥ niwī. ¹⁰ No'o āpērārē a'metārābajaque'atirārē, no'o ɥmɥa se'saro numia me'rā weewɥaranojō weerānojōrē cūucɥ niwī. Numia quē'rārē na weronojō weewɥarānojōrēta cūucɥ niwī. Tojo nicā masārē ñe'e, āpērāpüre duaturiarārē cūucɥ niwī. Nisoosebucurārē, tojo nicā “Ō'acū me'rā diacjūta ni'i” nisoorānojōrē cūucɥ niwī. Tojo nicā nipe'tise añuse bu'esere cā'mota'arānojōrē Ō'acū cū dutisere cūucɥ niwī. ¹¹ A'te bu'ese, añubutiase Ō'acū yɥ'rɥose queti nírōnojōta ni'i. Cū añuyɥ'rɥɥ yɥ'ure a'te quetire weredutiwī.

Pablo “Yɥ'ɥ ña'agū nimicā, Ō'acū yɥ'ure añurō weewī” n'ique ni'i

¹² Yɥ'ɥ marī wiogɥ Jesucristore e'catise o'o'o. Cū yɥ'ure añurō wācūgū, cū yarārē yɥ'ure weetamudutiwī. Tojo weedutigɥ, yɥ'ure tutu-asere o'owī. ¹³ Todɥporopɥ yɥ'ɥ cārē ña'arō ucūwū. Cū yarārē ña'abutiario weewɥ. Titapüre yɥ'ɥ Jesucristore ējōpeotitjāgū, yɥ'ɥ weesere masītiwɥ. Tojo weegɥ Ō'acū yɥ'ure pajaña'wī. ¹⁴ Marī wiogɥ yɥ'ure ma'ígū, añubutiario weewī. Cū yɥ'ure Jesucristore añurō ējōpeocā weewī. Āpērārē ma'icā weewī.

¹⁵ A'te yɥ'ɥ ucūatje queoro waro ni'i. Nipe'tirā ējōpeoroua'a. A'tiro ni'i. Jesucristo ña'arō weerārē yɥ'rɥosī'rīgū a'ti nucūcāpüre a'ticɥ niwī. Yɥ'ɥta nipe'tirā yɥ'rɥoro ña'arō weeyɥ'rɥnɥ'cā'cɥ ni'i. ¹⁶ Tojo nimicā, Ō'acū yɥ'ure pajaña'wī. Cū tojo weese me'rā Jesucristo

ña'arõ weerãre pajaña'sere yu'ure ï'omũ'tãwĩ. Cũ masãre pajaña'se ne pe'tisome. Yu'ure, ña'arõ weeyu'rũnu'cã'cũre pajaña'caronojõta nipe'tirã cũrẽ ãjõpeorãre pajaña'gũsami. Narẽ cũ me'rã catinu'cũcã weegũsami. ¹⁷ Tojo weerã Õ'acũrẽ “Añuyũ'rũami”, ninu'cũrã. Cũ wioгу ninu'cũgũ nimi. Ne wẽrĩsome. Õ'acũ ni'cũta nimi. Cũ bajutigũ, masĩyũ'rũgũ nimi. Tojota nimi.

¹⁸⁻¹⁹ Timoteo, mũ'u yu'u macũ weronojõ ni'i. Yu'u mũ'urẽ weeduti'quere weeya. Todũporo marĩ acawererã mũ'urẽ Õ'acũ wereduti'quere werepã. Na were'caronojõta weeya. Tere wéegũ, tutuaro me'rã du'ucũurõ marĩrõ añurõ weesere weenu'cũcã'ña. Tojo nicã queoro ãjõpeo, bu'iri marĩgũ tũ'oña'ña. Æpẽrã Jesucristore ãjõpeorã queoro weemasĩmirã, weeticãrã niwã. Tere weetirã, Jesucristore ãjõpeodu'ucãrã niwã. ²⁰ A'te tojo wa'awũ Himeneorẽ, tojo nicã Alejandrore. Tojo weegũ ã'rã pũarãrẽ Õ'acũrẽ ña'arõ ucũnemoticã'to nígũ Jesucristore ãjõpeorã me'rã ninemodutitiwũ. Narẽ wãtĩa wioгy de'ro weesĩ'rĩrõ weeato nígũ tojo weewũ.

2

“Õ'acũrẽ sẽrĩrã, a'tiro weerũa'a” ni'que ni'i

¹ Ne waro Jesucristore ãjõpeorã a'tiro weecã u'a. Nipe'tirãrẽ sẽrĩbosarã. Õ'acũ narẽ weetamuato nírã sẽrĩbosato. Õ'acũrẽ sẽrĩrã, “Añu'u”, niato. ² Wiorãrẽ, nipe'tirã dutiri masãrẽ sẽrĩbosato. Marĩ tojo weerã a'mequẽse marĩrõ nirãsa'a. Nipe'tise Õ'acũ dutisere queoro

weemasĩrãsa'a. Masã me'rã queoro nisetirãsa'a. ³ Marĩ ãpẽrãrẽ sẽrĩbosarã, añurõ weerã wee'e. Õ'acũ marĩrẽ yũ'rũogũ tojo weecã tũ'sasami. ⁴ Õ'acũ nipe'tirãrẽ cũ tiropũ wa'acã ɥasami. Nipe'tirãrẽ cũ ye, diacjũ cjasere masĩcã ɥasami. ⁵ Õ'acũ ni'cũta nimi. Tojo nicã Jesucristo ni'cũta tja masãrẽ Õ'acũ me'rã apobosari masũ nimi. Cũ masũ weronojõ upũtigũ nicũ niwĩ. ⁶ Jesucristo nipe'tirã masãrẽ yũ'rũogũ wẽrĩbosacũ niwĩ. Marĩ ña'arõ wee'que wapare wapayegũ tojo weecũ niwĩ. A'te quetire "Tojo wa'arosa'a" nĩcatero ejacã, werebajurẽno'caro niwũ. ⁷ Cũ ye quetire weredutigũ Cristo yũ'ũre sõrõwĩ. Cũ besecũú'cũ niato nígũ judío masã nitirãrẽ cũ ye, diacjũ cjasere bu'edutigũ sõrõwĩ. Diacjũta ni'i. Nisoogũ mejẽta wee'e.

⁸ Tojo weegũ nipe'tirocjãrã ɥmũarẽ a'tiro weecã ɥa'a. Na nerẽwũaropũ Õ'acũrẽ sẽrĩcã ɥa'a. Ñũmorõ sẽrĩrã, ña'arõ weese moorã sẽrĩrõɥa'a. Uase, a'metu'tise moorã sẽrĩrõɥa'a. ⁹ Numia quẽ'rã a'tiro weecã ɥa'a. Na su'tire añurõ ñ'atũ'saropũta sãñato. Ejatuario weeme'rĩcã'to. Na upũre ãpẽrã "Añurã nima" nidutirã peje ma'masu'ayũ'rũoticã'to. ¹⁰ A'tiro pe'e weeato. Añurõ bajusĩrĩrã, Õ'acũrẽ ãjõpeorã numia weewũasenojõrẽ weeato. Bajuyoropũre añurõ weese me'rã "Añurã nima", nino'ato. ãpẽrãrẽ weetamu, añurõ weeato. ¹¹ Jesucristore ãjõpeorã nerẽ, ña bu'eri curare numia di'tamarĩrõ tũ'oato. Ûrũsãma'a, ye'suticã'to. ¹² Ne numiarẽ masã decopũ werenu'cũcã ɥawe'e. Tojo nicã ɥmũarẽ

ne dutiticã'to. Tojo weronojõ o'orã, na numia di'tamarĩato. ¹³ A'tiro ni'i. Õ'acũ Adãrẽ weemũ'tãcũ niwĩ. Cũ be'ro Evare weecũ niwĩ. ¹⁴ Apeye quẽ'rãrẽ, Adã wãtĩ nisoono'mũ'tãcũ mejẽta nimi. Numio pe'e nisoono'mũ'tãco niwõ. Tojo weeno'co niyugo, Õ'acũ duti'quere yũ'rũnũ'cãco niwõ. ¹⁵ Tojo nimicã, Õ'acũ numiarẽ yũ'rũogũsami. Na põ'rãticã, narẽ añurõ yũ'rũweticã weegũsami. Na cũrẽ ějõpeocã, masãrẽ ma'icã, tojo weegũsami. Na queoro wãcũyu, weeseticã, Õ'acũ cũ ɯaro weenu'cũcã, yũ'rũweticã weegũsami.

3

Jesucristore ějõpeori curuacjãrã sũ'ori nirãrẽ sõrõse ni'i

¹ Masã a'tiro ucũwũase diacjũta ni'i: "No'o Jesucristore ějõpeori curuacjãrã sũ'ori nigũ, sũ'ori wejepeogu sãjãsĩ'rĩgũnojõ añuse da'rasere weesĩ'rĩgũ weemi." ² Tojo weesĩ'rĩgũnojõ a'tiro nirõũa'a. Cũta "Ñã'arõ weemi" nino'ña marĩgũ nirõũa'a. Ni'cõta numotigu nirõũa'a. Cũ wiopesase me'rã weesetigũnojõ nirõũa'a. Añurõ wãcũyu weesetigũnojõ nirõũa'a. Āpẽrã wiopesase me'rã ĩ'ano'gũnojõ nirõũa'a. Sijari masã cũ ya wi'ipũ wa'acã, añurõ põtẽrĩgũnojõ nirõũa'a. Āpẽrãrẽ añurõ bu'eme'rĩgũnojõ nirõũa'a. ³ Tojo nicã que'agu, cumucabucũ niticã'rõũa'a. Tojo weronojõ o'ogu, tu'tiro marĩrõ masãrẽ queoro weegũnojõ nirõũa'a. A'mequẽsere ɯatigu, niyerure ɯaripejatigũnojõ nirõũa'a.

4 Cũ, cũ ya wi'icjārārē añurō dutimasĩgũ nirõua'a. Cũ pō'rārē añurō wiopesase me'rã yu'time'rĩcã weegú nirõua'a. ⁵ Cũ, cũ ya wi'icjārārē dutimasĩtigũ, Õ'acūrē ějõpeori curuacjārã pe'ere totá nemorō co'tetibosami. ⁶ Jesucristore ne waropũ ějõpeomujãti'cure su'ori wejepeogu sōrõña. Apetero weegu ni'cũ ějõpeoca be'roacã sōrõno'cu pe'e “Yũ'ũ ãpērã yu'rũoro añuyu'rũnu'cã'a”, nibosami. Cũ tojo nígũ, wãtĩ weronojō wãcũbosami. Tojo weegu Õ'acũ wãtĩrē bu'iri da're'caro weronojō cūrē weebosami. ⁷ Apeye quē'rārē a'tiro nino'gūrē beseya. Jesucristore ějõpeotirã “Cũta añurō weemi” nino'gũ niato. Tojo weeticãma, ãpērã cūrē ña'arō wãcũbosama. Cũ uaro wéégũ, bopoyagu wãtĩ uaro weebosami.

“Weetamuco'terã a'tiro nisetiroña'a” nise ni'i

⁸ Jesucristore ějõpeori curuacjārã, Õ'acũ ye queti wererārē weetamuco'terã quē'rã na wiorã weronojō nirõua'a. ãpērã ějõpeono'rãnojō nirõua'a. Na ucũsere queoro weerãnojō nirõua'a. Que'arã, ña'arō weese me'rã niyeru wapata'asĩ'rĩrãnojō niticã'rõua'a. ⁹ Marĩ ějõpeose Jesucristo ye queti Õ'acũ ĩ'o'quere ějõpeonu'cũrã nirõua'a. Na bu'iri moorã tu'oña'rã nirõua'a. ¹⁰ Narē sōrõati duporo na weesetisere añurō masĩrõua'a. Na añurō weeseticã, bu'iri marĩcã ĩ'arã, sōrõrõua'a. ¹¹ Numia quē'rã mejārõta ãpērãrē ějõpeono'rãnojō nirõua'a. Ucjasepijarã niticã'rõua'a. Nucũĩ'ase me'rã weesetirã nirõua'a. Tojo nicã queoro weenu'cũrã

nirõua'a. ¹² Ƴmũ weetamuco'tegũ ni'cõta nũmotiroua'a. Cũ põ'rārē, cũ ya wi'icjārārē añurõ dutimasĩrõua'a. ¹³ Na weetamuco'tesere añurõ weecā, narē masā “Añurõ weema”, nirāsama. Tojo nicā Jesucristore na ějõpeosere uiro marĩrõ añurõ werenemorāsama.

Marĩ ějõpeose cjase ni'i

¹⁴⁻¹⁵ “Maata mũ'ũ tiropũ wa'aguti”, ni wācũ'u. Tojo wācũmigũ, apetero weegũ maata wa'atibosa'a. Tojo weegũ mũ'ũrē Ő'acũ põ'rā a'tiro nisetiroua'a nisere ojaguti. Ő'acũ catinu'cũgũ nimi. Cũ põ'rā Jesucristore ějõpeori curuacjārā nima. Náta Ő'acũ ye queti diacjũ cjasere masārē masĩcā weema. ¹⁶ Diacjũta ni'i. Marĩ ějõpeose todũporo masā masĩti'que ni'i. Mejõ nise niwe'e. Añuse waro ni'i. A'tiro ni'i: Ő'acũ macũ masũ weronojõ uputigũ a'ti nucũcāpũre bajuacũ niwĩ. Espĩritu Santu cũrē “Añugũ waro nimi”, ni werebajurēcũ niwĩ. Ő'acũrē wereco'terā Ƴ'mũsepũ nirā cũrē ĩ'acārā niwā. Cũ ye queti a'ti nucũcāpũre werese'sano'o. A'ti nucũcāpũre masā cũrē ějõpeoma. Be'ro Ő'acũ Ƴ'mũsepũ cũrē miacũ niwĩ.

4

“Diacjũ cjasere ějõpeotirā a'tiro weesama” nise ni'i

¹ Espĩritu Santu bajuyoropũ a'tiro nicũ niwĩ: “A'ti Ƴmũco pe'tiati dũporo āpērā Jesucristore ějõpeomi'cārā ějõpeodu'urāsama. Wātĩa

nisoose me'rã bu'esere wererãrẽ siruturãsama. Tojo nicã wãtã bu'esere siruturãsama.”
² Weeta'sari masã nisoose me'rã bu'ecã, tu'orãsama. Weeta'sari masã te nisoosere masimirã, ne bu'iritirã tu'oña'tima. ³ Na a'tiro weesama. Masãrẽ nũmotisĩ'rĩcã, cã'mota'asama. Tojo nicã ni'cãrẽ ba'asere ba'adutitisama. Õ'acũ pe'e a'te ba'asere weecu niwĩ. Jesucristore ãjõpeorãrẽ diacjũ cjase masĩrãrẽ ba'adutigũ tojo weecu niwĩ. Tere ba'arã, cãrẽ e'catise o'odutigũ tojo weecu niwĩ. ⁴ Nipe'tise Õ'acũ wee'que añuse ni'i. Marĩ ne yabiticã'rõũa'a. A'tiro pe'e weerõũa'a. Cãrẽ e'catise o'orã, ba'arõũa'a. ⁵ A'tiro ni'i. Õ'acũ tere “Añu ni'i”, nitojacũ niwĩ. Tojo weerã marĩ cãrẽ e'catise o'ocã, cũ te ba'asere añuse wa'acã weemi.

Pablo Timoteore weedutise ni'i

⁶ Mũ'ũ Õ'acũ ye cjasere marĩ acawererãrẽ bu'eya. Tere bu'égũ, Jesucristore añurõ da'raco'tegũ nigũsa'a. Siape me'rã mũ'ũ Õ'acũ ye cjasere bu'égũ, nemorõ ãjõpeogũsa'a. Mũ'ũ añuse bu'esere sirutuse me'rã nemorõ wãcũtutuagũ nigũsa'a. ⁷ A'ti turi cjase werema'asere tu'oticã'ña. Nemorõ Õ'acũ ãaro weenu'cũcã'ña. ⁸ A'tiro ni'i. Marĩ da'rarã, nemorõ tutuarã wa'asa'a. Te añu ni'i. Marĩ Õ'acũ ãaro weecã, totã nemorõ añusa'a. A'ti ãmũcopũre, be'ro ã'mũsepũre marĩrẽ añurõ wa'arõsa'a. ⁹ A'te diacjũta ni'i. Nipe'tirã a'tere ãjõpeorõũa'a. ¹⁰ Tojo weerã marĩ Jesucristo ye cjasere wererã, pi'eti, ãputũ da'ra'a. Õ'acũ marĩrẽ añurõ weeatjere wãcũ, e'catiyutojarã, tojo wee'e. Cũ catinu'cũgũ nipe'tirãrẽ yũ'rõogũ

nimi. Cūrē ějōpeorā se'sarore yu'rũogusami.

¹¹ A'tere āpērārē dutiya. Narē tere bu'eya.

¹² Mũ'u ma'mũ nise ye bu'iri āpērā mũ'u ucũsere ějōpeotibosama. Tojo weesere cā'mota'aya. A'tiro pe'e weeya. Jesucristore ějōpeorārē añuse queose ĩ'oña. Mũ'u ucũwũase, mũ'u weesetise me'rā ĩ'oña. Tojo nicā āpērārē ma'ise, mũ'u Jesucristore ějōpeose me'rā ĩ'oña. Apeye quē'rārē añugũ mũ'u nise me'rā ĩ'oña.

¹³ Yũ'u topũ etase duporo nerērā, Ō'acũ ye quetire bu'eĩ'onu'cũcā'ña. Marĩ acawererārē wācũtutuadutigũ tojo weeya. Narē añurō bu'eya. ¹⁴ Ō'acũ mũ'urē weemasĩse o'o'quere weenu'cũcā'ña. Sō'onícatero Jesucristore ějōpeori curuacjārā sũ'ori nirā mũ'urē ñapeocaterore te weemasĩsere Ō'acũ o'owĩ.

¹⁵ Ō'acũ o'o'quere wācũnũrũ, añurō weenu'cũcā'ña. Tojo weecā, nipe'tirā mũ'u añurō weewā'cāsere ĩ'arāsama. ¹⁶ Apeye nigũti. Mũ'u bu'esere, tojo nicā mũ'u weesetisere añurō wācũña. Nipe'tisere queoro weenu'cũcā'ña. A'tere wéégũ, mũ'u basu yu'rũwetigũ weegusa'a. Tojo nicā mũ'u weresere tu'orā quē'rā yu'rũwetirāsama.

5

Jesucristore ějōpeorārē "A'tiro weeya" nise ni'i

¹ Timoteo, mũ'urē dutigũti. Bucũrā mũ'uarē tu'titicā'ña. Mũ'u, mũ'u pacũsumũarē ucũgũ weronojō narē wereya. Ma'mapjia quē'rārē mũ'u acabijirārē ucũgũ weronojō weeya.

² Bwcurã numiarẽ mu'u pacosãnumiarẽ ucũgũ weronojõ narẽ wereme'ricã'ña. Nu'miarẽ mu'u acabijirãrẽ weronojõ ña'arõ wãcũrõ marĩrõ wereya.

³ Wapewia numia weetamuno'ña marĩrãrẽ weetamuña. ⁴ Wapewio põ'rãticãma o pãrãmerãticãma, core na weetamuato. Ne waro na ya wi'icjãrã me'rã añurõ weewã'cõrõu'a. Tojo weerã põ'rã, pãrãmerã, na pacusũma, na ñecũsumã ma'i'que wapa ma'i a'merã weesama. Tojo weese añuse ni'i. Õ'acũ tere tũ'sasami. ⁵ Apego wapewio waro ni'cõ nigõ pũricã Õ'acũ weetamuatjere yucuesamo. Umũcorinucũ, ñamirĩnucũ tojo sãrĩnu'cũsamo. ⁶ Apego wapewio pe'e co uasere weema'acã'samo. Co pecame'epu wa'acjo weronojõ nitojasamo. ⁷ A'te quẽ'rãrẽ weedutiya. Tojo weeduticã, "Na bu'iri marĩrã nima", nino'rãsama. ⁸ A'tiro ni'i. Ni'cũ cũ acawererãrẽ añurõ weetigu, marĩ ãjõpeosere yabigu weronojõ nisami. Cũ ya wi'icjãrã warore añurõ weetigu pe'e, totã nemorõ ña'arõ weesami. Jesucristore ãjõpeotigu nemorõ ña'agũ nisami.

⁹ Wapewia numiarẽ weetamurãtirã na wãmerẽ ni'cã pũripu ojaõ'oña. A'tiro nirã numianojõrẽ ojaya: Bwcuo waro sesenta cũ'marĩ cuogore, ni'cũrẽta marãputi'core ojaya. ¹⁰ "Co añurõ weemo" nino'gõnojoõrẽ ojaya. Co põ'rãrẽ añurõ masõ'conojõrẽ masã co ya wi'ipu ejacã añurõ ñe'egõnojoõrẽ ojaya. Tojo nicã mejõ nisere da'rago ãpẽrã

Jesucristore ějōpeorārē weetamugōnojōrē ojaō'oña. Pi'etirārē weetamugōnojōrē ojaya. No'o añuse apeyenojō weegore ojaya.

¹¹ Āpērā wapewia numia nu'miacure nisama. Nanojōrē na wāmerē ojaticā'ña. Apetero na ʌmʌ me'rā nisī'rīrā, apaturi marāpūtibosama tja. Jesucristo pe'ere wācūdu'u, marāpūtise pe'ere wācūyʌ'rʌnʌ'cābosama. ¹² Na “Jesucristo ye dia'cūrē weerāti” ní'quere weetirā, bu'iritirā nibosama. ¹³ Apeye quērārē wi'seripʌ dia'cū sjarā, nijīsjarā dojobosama. Te dia'cūrē weetibosama. Ucjasebʌcʌrā dojobosama. Nipe'tise de'ro wa'asere ucjarā, na ye nitisere ucūwʌano'ña marīsere ucjabosama. ¹⁴ Tojo weegu wapewia numia nu'miacure nirārē marāpūticā ʌ'a. Na pō'rātiato. Wi'serire co'teato. Na tojo weecā, marīrē ĩ'atu'tigu “Na ña'arō weema”, nímasītisami. ¹⁵ A'tiro ni'i. Āpērā wapewia numia Jesucristore ějōpeomirā, cūrē ějōpeodu'uma. Wātīa wiogʌre siruturā, tojo weema.

¹⁶ Jesucristore ějōpeogu o ějōpeogo na acawerego wapewiore ʌobosama. Core ʌorā na weetamuato. Jesucristore ějōpeori curuacjārārē co'tedutiticā'to. Tojo weecā, āpērā wapewia numia co'teno'ña marīrā pe'ere co'temasīrāsama.

¹⁷ Jesucristore ějōpeori curuacjārārē sʌ'ori wejepeorārē, añurō weerārē a'tiro nirōʌa'a. “Na añubutiaro dutima”, nirōʌa'a. Totá masārē were bu'erā pe'ere nemorō nirōʌa'a. ¹⁸ Ō'acū ye queti ojáca pūrīpʌ nírōnojōta a'tiro ni'i: “Wecʌ trigore ārũagũ, tuumajāmisʌtʌasami.

Cũ ba'asĩ'rĩgũ, ba'ato. A'tiro weeticã'to. Trigore ba'ari nĩrã, cũ ɁeropɁ tuusãarĩ be'tore tuusãaticã'to." AperopɁre a'tiro ojano'wũ: "Da'rari masũ cũ da'rase wapa wapata'aba'amasĩmi," ni ojano'wũ. Tojo weerã sũ'ori nĩrãrẽ weetamurõɁa'a.

19 Apetero ni'cũ mɁ'ɁpɁre a'tiro nibosami: "Ɖsãrẽ sũ'ori wejepeogɁ ña'arõ weeami", ni weresãbosami. Cũ tojo nicã, tɁ'oticã'ña. PɁarã o i'tiarã ĩ'a'cãrã weresãcɁpɁ, tɁ'oya.

20 Ña'arõ weenu'cũrãrẽ nipe'tirã ĩ'orõpɁ tu'tiya. Tojo weecã, ãpẽrã uirã, ña'arõ weesome.

21 Õ'acũ ĩ'orõpɁre, Jesucristo marĩ wioɁ ĩ'orõpɁre mɁ'Ɂrẽ a'tiro nigũti. Tojo nicã Õ'acũrẽ wereco'terã cũ bese'cãrã ĩ'orõpɁ quẽ'rãrẽ mɁ'Ɂrẽ nigũti: Sũ'ori wejepeorãrẽ ni'cãrõnojõ weeya. MɁ'Ɂ tɁ'sarãnojõ dia'cũrẽ añurõ weeticã'ña. Nipe'tirãrẽ queoro weeya. 22 ĩ'abocurequejo, sũ'ori wejepeogɁre sõrõticã'ña. MɁ'Ɂ ña'arõ weerãrẽ besegɁ, na ña'arõ weesere bu'ipejatamubosa'a. Nipe'tise ña'arõ weesere cã'mota'aya.

23 MɁ'Ɂ paapɁ dutitise ye bu'iri aco dia'cũ sĩ'rĩticã'ña. Cã'rõacã vino quẽ'rãrẽ sĩ'rĩña.

24 Ni'cãrẽrãrẽ na ña'arõ weesere beseatji ðuporo maata na ña'arõ weesere masĩno'toja'a. ãpẽrã pe'ere na ña'arõ weese be'ropɁ ba-juarosa'a. 25 Mejãrõta tja añurõ weese quẽ'rã maata masĩno'o. Apeye pe'e añurõ weese maata bajutise be'ropɁ bajarosa'a.

6

¹ Jesucristore ějōpeorã da'racō'teri masã na wiorãrē wiopesase me'rã ĩ'arōua'a. Na tojo weecã, Ō'acūrē, tojo nicã marĩ bu'esere ãpērã ña'arō ucūsōme. ² Na wiorã Jesucristore ějōpeorã nicã, a'tiro weeticã'to. Na ějōpeorã nise bu'iri narē wiopesase marĩrō ĩ'aticã'to. A'tiro pe'e weeato. Nemorō añurō weeato. Na wiorã Jesucristore ějōpeorã nima. Tojo weerã na acawererã na mairãrē weronjō añurō weeato. A'tere were, bu'eya narē.

Marĩ ějōpeosere queoro weedutise ni'i

³ No'o mejēcã bu'egũnojō a'tiro nisami. Marĩ wioꝑũ Jesucristo ye bu'esere "Tojo niwe'e", nisami. Tojo nicã marĩ ějōpeose quē'rãrē "Tojo niwe'e", nisami. ⁴ Tojo nigũ masĩtimigũ, "Ãpērã yu'rũoro masĩyu'rũnũ'cã'a", nisami. Cũ tojo nigũ tu'omasĩtigũ nimi. Cũ na ucūsenucūrē "Tojo niwe'e", nimũjãsamĩ. Te me'rã a'merĩ uose, a'metu'tise, yabise, a'merĩ ějōpeotise wã'cã'a. ⁵ Tojo nicã ãpērã mejō warota a'metu'tise wã'cã'a. Ña'arō wãcũrã, tojo weesama. Diacjũ cjasere ne masĩtisama. Tojo weerã me'rã a'mesu'aticã'ña. Na "Ō'acūrē ějōpeose me'rã wapata'arãsa'a", ni wãcūsama. ⁶ Tojota ni'i, nĩrō. Diacjũta marĩ Ō'acūrē ějōpeose me'rã peje apeyenojō cuorã weronjō ni'i. Marĩ cuoro ejatuaro e'caticãma, tojota ni'i. ⁷ A'tiro ni'i. Marĩ a'ti turipure bajarã, ne apeyenojō me'rã bajuatiwũ. Wēĩrãpũ quē'rã ne apeyenojō miasome. ⁸ Marĩ su'ti, ba'ase

cuose me'rã e'catiroña'a. ⁹ Æpẽrã pe'e peje cuosĩ'rĩrã ñaripejarã no'o ñaro weema'asama. Siape me'rã nemorõ ñaripejadojasama. Te me'rã na dojo, bu'iri da'reno'rãsama. Pecame'epu wa'arãsama. ¹⁰ A'tiro ni'i. Niyeru ñaripejase me'rã nipe'tise ña'ase ña'pocãti'i. Æpẽrã Jesucristore ñjõpeomi'cãrã a'te ñaripejase me'rã na ñjõpeomi'quere du'ucã'sama. Tojo weerã ni'cãrõacãrẽ na catiri ñmũcore peje bujawetise bocama.

Pablo Timoteore “Queoro weeya” nise ni'i

¹¹ Timoteo, mũ'u pũrĩcã Õ'acũ yagu ñaripejasere ne weema'aticã'ña. A'tiro pe'e weeya. Añurõ weenu'cũcã'ña. Õ'acũrẽ sirutuya. Cũrẽ ñjõpeoya. Nipe'tirãrẽ ma'ĩña. Mejẽcã wa'acã, wãcũtutuaya. Tu'tiro marĩrõ ãpẽrãrẽ añurõ weeya. ¹² Mũ'u tutuaro põtẽorõ wãcũtutua, ñjõpeonu'cũcã'ña. Catise ñ'mũsepu mũ'u Õ'acũ me'rã ninu'cũatjere wãcũnu'cũcã'ña. Õ'acũ catise pe'titisere o'osĩ'rĩgũ mũ'urẽ besecu niwĩ. Tojo weegu tere wãcũyu'rũnu'cãcã, mũ'urẽ o'ogusami. Mũ'u pãjãrã tu'oropu Jesucristore ñjõpeosere queoro werewu. ¹³⁻¹⁴ Õ'acũ nipe'tirãrẽ catise o'ogu nimi. Cũ ñ'orõpu, tojo nicã Jesucristo ñ'orõpu quẽ'rãrẽ mũ'urẽ weeduti'i. Jesucristomarĩcã cũ catiri ñmũcore ma'itigu, a'tiro weecu niwĩ. Poncio Pilatore cũ nisetisere añurõ werecu niwĩ. Mũ'u quẽ'rã yu'u dutise nipe'tisere ñucayuro marĩrõ queoro wereya. “Cũ queoro weetimi”, nino'ticã'ña. Marĩ wiogu Jesucristo a'tiri curapu tojo weedu'uya. ¹⁵ Õ'acũ “Tojo

weeguti” nícatero ejacã, nipe'tise cã ní'quere queoro tu'ajanu'cõgũsami. Õ'acũ ni'cũta añuyuru'rugũ, tutuayuru'rugũ nimi. Nipe'tirã wiorã wiogũ nimi. ¹⁶ Cũ ni'cũta catinu'cũmi. Cũ pũrõ asisteropũ nimi. Ne ni'cũ masũ cũ basu Õ'acũ nirõpũ wa'amasĩtimi. Ne ni'cũ cãrẽ ĩ'aticũ niwĩ. ĩ'ata basiowe'e. Õ'acũ ni'cũrẽta añurõ ucũyuru'runu'cãrõua'a. “Cũ wiogũ ninu'cũato”, nirõua'a. Tojota niato.

¹⁷ No'o peje cõorãnojõrẽ a'tiro weedutiya. Na “Ãpẽrã yuru'rooro niyuru'runu'cã'a”, niticã'to. Na cõose me'rã “Añurõ wa'arosa'a”, ni e'catiyuticã'to. Te queoro niwe'e. Pe'tidija wa'arosa'a. Tojo weronjõ o'orã, Õ'acũ pe'ere e'catise me'rã yucueato. Cũ catinu'cũgũ marĩrẽ e'caticã uagu, nipe'tise marĩ cõosere o'omi. ¹⁸ Peje cõorãrẽ añusere weedutiya. Ãpẽrãrẽ añurõ weeato. Na cõosere o'oato. ¹⁹ Na tojo wéerã, ape umucopure peje cõorã weronjõ niyutojarãsama. Na catinu'cũatjere bocarãsama.

Pablo Timoteore “Tojo weeya”, nituo'que ni'i

²⁰ Timoteo, Õ'acũ mũ'urẽ weredutigu cũu'quere añurõ weeya. A'ti nucũcã cjase ucũse mejõ nisere tu'otıcã'ña. Tojo nicã mejẽcã no'o uaro ucũma'ase quẽ'rãrẽ tu'otıcã'ña. Ãpẽrã “Masĩrã waro ni'i” nirã peje mejẽcã wãcũse cõoma. Upũtu na uaro ucũma'asama. Na masĩse nisoo ucũma'ase ni'i. Tojo weegũ narẽ tu'otıcã'ña. ²¹ Ni'cãrẽrã a'tere weesiruturã, Jesucristore ejõpeomi'quere du'ucã'cãrã niwã.

Õ'acũ mũ'urẽ añurõ weeato.

Tocã'rõta oja'a.
Pablo

**Õ'âkã hi yeere uúkũri turi Tukano
New Testament in Tucano (BR:tuo:Tucano)**

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 22 Feb 2024 from source
files dated 31 Aug 2023

00ebd04f-7b0d-5a72-9407-eb53ae2bd086